

Akong Balaanong Pagkatawo ug Katuyoan

1. Basaha kini nga pamahayag ni Elder Dieter F. Uchtdorf sa Korum sa Napulog Duha ka Apostoles, nga mangita sa mga tinguha sa Manluluwas para nimo:



Ako nagtuo nga ang Manluluwas nga si Jesukristo gusto nga inyong makita, mabati, ug mahibaloan nga Siya mao ang inyong kalig-on. Nga uban sa Iyang tabang, walay kinutoban ang unsay inyong mahimo. Nga ang inyong potensiyal walay kinutoban. Siya gusto nga kamo makakita sa inyong kaugalingon sa paagi nga Siya nakakita kaninyo. Ug kana lahi kaayo gikan sa paagi sa pagtan-aw sa kalibotan kaninyo.

Ang Manluluwas mopahayag, sa sigurado gayod nga paagi, nga kamo usa ka anak nga babaye o anak nga lalaki sa Makagagahom nga Dios. Ang inyong Langitnong Amahan mao ang labing mahimayaon nga binuhat sa uniberso, puno sa gugma, hingpit nga kalipay, kaputli, kabalaan, kahayag, grasya, ug kamatuoran. Ug moabot ang adlaw nga Siya gusto nga kamo mopanunod sa tanan nga Iyang gipanag-iya. (Dieter F. Uchtdorf, “Si Jesukristo Mao ang Kalig-on sa Kabatan-onan,” *Liahona*, Nob. 2022, 9–10)

Basaha ang Doktrina ug mga Pakigsaad 14:7, nga mangita kon unsay gitinguha sa Langitnong Amahan nga ihatag kanimo.

2. Basaha kini nga pamahayag ni Sister Michelle D. Craig, kanhi Kinatibuk-ang Kapangulohan sa Young Women, nga mangita sa iyang tambag ngadto ni bisan kinsa nga mangutana bahin sa ilang balaanong bili:



Tingali ang labing importanteng butang nga klaro natong makita kon kinsa ang Dios ug kinsa gayod kita—anak nga mga lalaki ug anak nga mga babaye sa langitnong mga ginikanan nga adunay “diosnong kinaiya ug mahangtorong kapalaran” [tema sa Young Women, ChurchofJesusChrist.org]. Hangyoa ang Dios sa pagpadayag niini nga mga kamatuoran nganha kaninyo, uban sa unsay Iyang gibati mahitungod kaninyo. (Michelle D. Craig, “Mata aron sa Pagtan-aw,” *Liahona*, Nob. 2020, 15)

Basaha ang Doktrina ug mga Pakigsaad 18:10–13, nga mangita kon unsay gibati sa Langitnong Amahan bahin kanimo.

3. Basaha kini nga pamahayag ni Presidente Susan H. Porter, Kinatibuk-ang Presidente sa Primary, nga mangita kon nganong kinahanglan kitang mahibalo kon unsay gibati sa Langitnong Amahan kanato:



Kon kamo masayod ug makasabot unsa ka hingpit kamo nga gihigugma isip usa ka anak sa Dios, kini makausab sa tanan. Makausab kini unsay inyong gibati sa inyong kaugalingon kon kamo makahimo og mga sayop. Makausab kini unsay inyong bation kon mahitabo ang malisod nga mga butang. Makausab kini sa inyong pagsabot sa mga sugo sa Dios. Makausab kini sa inyong pagtan-aw sa uban ug sa inyong kapasidad sa paghimo og kalainan. (Susan H. Porter, “Ang Gugma sa Dios: Ang Labing Hingpit nga Kalipay sa Kalag,” *Liahona*, Nob. 2021, 33)

4. Basaha kini nga pamahayag ni Presidente Russell M. Nelson, nga mangita kon unsay Iyang gitudlo bahin sa mga gilaoman sa Langitnong Amahan alang sa matag usa kanato:



Ang plano sa Langitnong Amahan alang sa Iyang mga anak magtugot kanato nga magpuyo kon asa ug sa unsang paagi Siya nagpuyo ug sa kataposan anam-anam nga mamahimong mas sama Kaniya. Ang Iyang Plano literal nga mohimo sa labing buhong nga mga panalangin sa tanang kahangtoran nga maanaa alang kanato, lakip sa potensiyal alang kanato nga mamahimong “isigkamanunod uban kang Kristo.” [Mga Taga-Roma 8:17]. (Russell M. Nelson, “Mga Pagpili alang sa Kahangtoran” [tibuok kalibotan nga debosyonal alang sa mga young adult, Mayo 15, 2022], broadcasts.ChurchofJesusChrist.org)